

Wanita tertimbus sedalam 8 meter

Oleh **TUAN NURHIDAYAH**
TUAN AB. GHANI

KUALA LUMPUR - Seorang pelancong wanita tertimbus di dalam lubang sedalam kira-kira lapan meter dalam kejadian lubang jerlus berdekatan Masjid India di sini semalam.

Kejadian kira-kira pukul 8 pagi itu berlaku ketika mangsa yang dipercayai dari India sedang berjalan bersama seorang ahli keluarganya di hadapan Malayan Mission di Jalan Masjid India.


Berdasarkan rakaman televisyen litar tertutup (CCTV), mangsa dilihat sedang berjalan berseorangan di belakang tiga individu lain sebelum laluan pejalan kaki yang dipijaknya runtuh secara tiba-tiba.

Insiden itu hampir menyebabkan beberapa individu yang sedang duduk di kerusi batu berhampiran lokasi runtuhan terjatuh, namun mereka sempat menyelamatkan diri.

Sumber memaklumkan, mangsa bersama keluarganya sedang berada di negara ini untuk bercuti dan semalam merupakan hari terakhir mereka berada di Kuala Lumpur.

Dalam pada itu, operasi mencari dan menyelamatkan (SAR) wanita warga India itu melibatkan seramai 90 anggota terdiri daripada Jabatan Bomba dan Penyelamat (35), Dewan Bandaraya Kuala Lumpur (14), polis (32), Jabatan Pertahanan Awam Malaysia (5) dan Hospital Kuala Lumpur (4).

Timbalan Jabatan Bomba dan Penyelamat (JBPM) Kuala Lumpur, Rozihan Anwar Mamat berkata, pasukan penyelamat mengorek kawasan tanah menadap itu bagi memudahkan pen-



LOKASI kejadian lubang jerlus melibatkan seorang wanita warga asing di Jalan Masjid India, Kuala Lumpur semalam.

carian mangsa.

"Kita sudah buat carian manual tetapi gagal menjumpai mangsa. Jadi kita menggerakkan bantuan jengkaut milik DBKL untuk kerja-kerja menyelamatkan."

"Pasukan SAR juga membuat korekan lebih luas di tempat mendapan," katanya ketika ditemui di lokasi semalam.

Berdasarkan tinjauan *Kosmo!* di lokasi kejadian, pasukan penyelamat yang menggunakan jengkaut berjaya memasuki

lubang runtuhan dan membawa naik sebuah kerusi batu.

Selain itu, beberapa individu dipercayai ahli keluarga mangsa turut berada di lokasi kejadian, namun mereka masih enggan ditemu bual wartawan.

Dalam pada itu, Ketua Polis Daerah Dang Wangi, Asisten Komisioner Sulizme Affendy Sulaiman berkata, pihaknya juga masih menjalankan siasatan untuk mengenal pasti identiti mangsa dan punca sebenar ke-

jadian.

"Memandangkan kes masih disiasat, kita tidak boleh dedahkan butiran lanjut mangsa. Kerja-kerja penyelamatan melibatkan pelbagai pasukan diteruskan sehinggalah mangsa dijumpai."

"Saya difahamkan mangsa berjalan kaki dari Selangor Mansion ke arah Lebuh Ampang dan sempat duduk di kerusi konkrit."

"Kita akan teliti rakaman CCTV nanti dan selain mendapatkan keterangan saksi-saksi di

lokasi kejadian," ujarnya.

Menurut beliau, keadaan sekitar lokasi kejadian masih selamat, namun perbincangan lanjut akan diadakan bagi mempertimbangkan sama ada kawasan tersebut di tutup atau sebaliknya.

"Kita belum buat keputusan untuk menutup kawasan ini sepenuhnya, kita rasakan ia masih selamat, kita akan buat beberapa kajian dan jika dirasakan perlu ditutup, maka kita akan maklumkan kelak," katanya.



SEBAHAGIAN anggota bomba yang terlibat dalam operasi SAR di Jalan Masjid India.



JENTERA berat digunakan untuk melancarkan operasi mencari mangsa.